

欽差總督五省軍務兵部尚書兼都察院左都

御史李若星於崇禎十一年秋九月奉

命勘定水西善後事宜纂修通志所有貴州等

處承宣布政使司左布政使功加一品服

俸朱家民創造盤江鐵橋一座義築連雲

有嘉靖氛恬波奏膚等城十一座蒙

御製城名遵奉建碑鐫勒外凡修防險隘及經

遊詩文編次繪圖進陳

睿覽以識始末云



連雲新城


西疆第一關



朱氏



滄州飛渡

玉皇閣







苦海慈航

鑿山建制振

清鈴佛方

出世

鎖鐵橫空

成大筏人可

補天

少師朱

變元題

水繇廣西泗

城州入南海

紫陽書
院藏板

丁酉脩
楔日圖

崇禎戊辰廣陵
人朱家民造

屈滕祠

三元宮

麟駁世
珍朱紫
重之



唐郭子儀遣使入魏田承嗣拜曰此
糜不屈于人久矣今我師之祠無問
知與不知皆下車瞻拜咨嗟嘆服乃
知威名傾人不獨令公然也因建屈
滕祠以誦功云 門人曹代之恭題

補天祠像

袞有缺端冕而入告耶鴻未
集仰視而深思耶嗚呼功著
社稷慶流子孫南裔不反武
侯再來金城可啻克國弗用
憎也老成典型可望而識耶
悲夫 漳海黃道周敬贊

漳海黃道周敬贊



奉
天承運

皇帝制曰恭儉者召功之符忠純者起世之藥朕緬懷武功杰士且歎且悲屢念綏遠良臣如饑如渴今而後知先朝之固自有人也爾晉階資政大夫貴州等處承宣布政使司左布政使朱家民廼鎮守福建漳泉兼轄廣東潮州地方總兵官後軍都督府左都督朱潮遠之父降生出正直之神履道入聖賢之室天俾孝友地載廉明五馬貴陽竹黔一帶咸沾海潤之功塞北雙旌宣代沿邊盡沐天泓之澤於是檄西蜀之將川

士受成即時解貴州之圍苗人革命取牛嶺復馬場皆身先士卒恢鴨池闢鴉關遂志感風雲周相國遍體刀痕固云開創雷將軍滿面箭血亦曰偏裨寧有儒臣又在中葉黔人思方伯舊績欲作鐵橋之誦滇士景資政大儒每懷絳帳之風有斯忠盡屢建勳勞茲以覃恩晉爾階爲榮祿大夫於戲畢宏雖往世仍想其箕裘崔珏尚存人共歸其弓劍爾世世永思哉

制誥

崇禎拾陸年拾壹月

日

之寶

廣運

題橋勒石

紫陽書院

滄洲飛渡

張瑞圖

天塹雲航

朱燮元

玄橋佛地

朱宗遠稱鐵橋制奇書贈同人先生

董其昌

小葛第二橋

漢諸葛始造瀾江橋今見此故題云

傅宗龍

禹思文望

錢士晉

愛珠橋

崇禎三年九月壯宣天言代耳目萬里外鐵橋勝跡所關封疆必識之

張鏡心

苦海慈航

王鐸

濟川飛虹

名與河洛圖書共休徵也爰勒石以垂悠久

張鏞

降魔法界

劉士禎

鐵橋志書上卷

鄭元勳超宗閱

廣陵後學梁于浹飲光選

宗 瀨開先較

盤江鐵橋記

董應揚撰

夫橋濟津達阻所在有之然不過或編竹或架木或甃石已耳未聞以鐵者以鐵則亘古迄今僅兩見焉一見於瀾江漢相諸葛孔明征南時造也一見於盤江則明總憲朱同翁通滇時造

也蓋鐵之爲物重而堅冶鑄良不易矧當奔騰
浩瀚之所而欲計畫成橋踞其上匪獨首事者
懼非嘗之原卽筭財者併慮不貲之費所以難
耳自非有孔明其人者烏能勝其任而規矧乎
按總憲公值水蘭跳梁之日道塗阻塞檄通上
衛公不待兵馬之集躬率親兵千人乘間關路
以直抵盤江非所謂用兵如神者耶盤江層崖
疊嶂間爲黔滇衝危之界其深無底濶且三十
六丈公倉忙夜渡不免爲驚濤所震撼乃憮然

曰此非橋不可橋非鐵不可鐵橋不成吾甘以
身殉卽此一語矢誓拯溺死而後已足動天地
而格鬼神矣用是捐俸鳩工越三年而告成事
聿攷其制則鎔鐵成扣聯扣成索而多餘其索
之頭末以鈕鐵軸而藏山窟中仍加重覆焉卽
木牛流馬之巧何以過是公真孔明以後一人
爾至於今令行旅之竭蹶而趨者商賈之擔囊
而至者與夫士大夫之駕輿馬而經臨者渡險
塹若坦途而永無載胥及溺之患是誰之賜歟

且樓閣城垣仙壇梵宇歷歷具備一旦驅風波
 蛟纏之恐而往來無恙耳目頓新寧獨人力蓋
 亦有天助焉語云天道無親嘗與善人又云天
 之所與必于其身又于其子孫余不佞揚與公
 共事黔城每觀公沉靜寡言咲若不欲自露其
 才智者而一段真誠愷悌隱隱沁人肺腑昔宋
 公以竹橋總憲公以鐵橋積德累勞後先相映
 睹斯不朽得無深致意云

董公與先君計偕約
 晤金山於乙亥年五
 月公携長公各復者踐盟金山抵足者數晝
 夜余潮遠亦奉公顏色今長公歷官銀臺云

盤江鐵橋記

龍文光

古今所稱不朽之業殊絕之勲非有大過人之
 精神力量不能揭其軸而愉快而大過人之精
 神力量則天地間氣鍾之以資其補救拯溺亨
 屯者也汎覽宙合有餘不足之數三才參焉享
 其有餘則為福醫勿藥有喜豐年玉是也補其
 不足則為神醫起死回生荒年穀是也黔自安
 酋洵沸何田興盤江之險其窞叵測其毒奔瀕當
 年懷襄之惡沉竈產蛙者十閱月夫誰不願施

慈航以渡衆生其如乏濟川之具何也同人方伯朱公甫啣 王命來守貴陽慨然曰此金筑劫數天地缺陷非吾人孰與補而救之乃舍熊軾介馬而馳灑包胥之淚乞師嵩雒九頓而歸先聲膽落重圍已解遂持監軍節鉞乘勝掃蕩苗腥越三年提兵通上衛如飛如翰夜渡盤江幾化猿鶴狼烟忽淨及叅黔中大政計與萬姓救寧而十三城以建次第鳩厥橋工此一時也缺陷在人事賴一段過人精力旋轉坤乾而坤

乾爲之開泰造化頗無畱憾矣嗣而總風憲之司者十一年布旬宣之政者六年夜郎三十餘郡衛人歌明允戶仰屏藩不猶從狂瀾危浪中登之彼岸引之由庚今而後螻蟻有莠皆方伯造之命也方伯宦黔十七載于茲矣天之所優藉方伯者至矣未橋以前爲補不足之天旣橋以後爲享有餘之天人見其橋之偉也嘆其工神斧鬼如蔡君謨之橋雒陽者有詫其施博衆濟似諸葛武侯之橋瀾滄者又咄嗟于王政輿

梁大勝國僑之乘輿者豈知方伯之橋盤江實
有超于是者乎盤江天塹特限滇黔源出烏撒
經幾千萬盤將趨南海至此兩山鈎連石骨撐
波其深無極自開闢來續精衛之魂者指固難
屈以視水西之濁氣特一時出沒之險若江上
之驚濤尤爲惟日不足之阨也表裏河山雄勝
在此甌缺亦在此方伯旣能以一木支人事之
大厦豈不能以五色補天地之傾頽今觀其鐵
鎖飛空波底之長蛟永馴地補矣樓閣凌霄城

頭之銀虹接漢天補矣往來之人萬世之下指
斯橋曰是崇禎元年朱方伯所經營也是朱方
伯平定禍亂之餘緒所就也覩河雒者思禹功
望銅柱者識馬援曾履鐵橋而不興懷方伯也
耶雖然方伯勲業不在區區一橋供人膾炙縱
燕然之石鐫勒亦所難罄唯茲盤江特窺見一
斑耳其知者盛德至善終不可謾於橋無與也
其不知者耕鑿順則相忘何有于橋無與也世
俗乃謂其工巧竒絕便足千秋是將營謝一節

蓋召虎平生恐江漢擴清以後作召公考者固
多也易之泰曰裁成天地輔相宜方伯反否爲
泰良繇三之艱貞而後食福也於大過之時內
沉潛而外和協乃底非嘗之原方伯庶幾四之
棟隆矣茲當 觀行屬予爲文以記予觀鐵橋
記詠非一名手矣所餘鱗爪相其文章缺陷處
思以補之亦曰裁成輔相而運以艱貞巽說方
伯且休休歆歆不自有其橋人安得以橋盡方
伯哉古之大臣恢綱拓紘業無鉅細苟有利于

社稷期無憾而後卽安及臻厥成可見者在人
耳目不可見者在人肝腎今鬼方之耳目肝腎
于方伯耦俱無猜也則橋或以方伯傳而方伯
斷不以橋傳也明矣方伯真天地間不可無一
不可得二之傑者黔人何幸饑溺之際獲蒙禹
稷大力哉 聖天子旣紆西南之顧將借弼東
北盡展裁成輔相之畧又何憂寇焰排山世界
缺陷乎昔富平津橋成天子率百官宴其上舉
酒勸勞今方伯入拜 龍顏必以觴元凱者觴

方伯千載有同榮焉元凱出入將相功在社稷
聲施至今其非以一橋顯名可知回思成於鐵
牛石血者亦當作如是觀

朱潮遠日先生以蔡端明洛陽橋而褒美盤
江初甚不解洛陽命名之意及承乏漳泉屢
從橋過得以徜徉縱觀詳考往迹其江去晉
江縣東北二十里唐宣宗微時至此見江勢
有類洛陽故名之宋慶曆初郡人陳寵甃石
作沉橋不就會端明殿學士蔡襄來守是郡
慨然立石爲梁長三百六十丈中有島嶼亭
閣其間環多碑碣惜不能錄襄爲閩部使時
夾道種松七百里以庇行人歎毒今松雖不
存人常數百年懷之先君於黔地脩補山路
一千餘里想亦端
明之遺意也痛哉

遊盤江鐵橋記

劉士禎

宇宙間山川氣色之開境地造設之巧雖亦有
機以奏之運以通之而寔因乎人之精神故網
緼相感霧湧雲蒸呼吸相召星流電激而披艱
掃穢蕩海平岳蹴倒崑崙蹋動泰山僅亦志氣
之交應耳又何足異乎黔之盤江古未有橋也
量濶雖三十六丈而其深無際艱于下手故以
木架以石墩者悉漂沒而無所着底憲長朱公
始急於靖苗氛而躬犯怒濤遂急於厝安瀾而

念決利濟此一段勇往剛果之氣將何壘之不可濱抑何險之不可平已而陸續興工竟成鐵橋詳別紀不必再贅唯是盤江一帶歷查城經關嶺崎嶇險惡嵐瘴侵人從來巡方使者未嘗過而問焉予廉其路遠職曠廢弛日甚不敢憚跋涉而阻間關憲副陳君亦贊之往因聯而上迤縱觀其際凡所爲庇橋之寺護橋之樓鎮橋之像壓橋之物巍巍乎森森乎而又鼎造一城橫列百雉無能擅越而徑渡總若因則於天肖

宜於地順勢於山察情於水其扼要爭竒則黔中第一勝跡也其乘險據利則黔中第一雄關也蓋以聯甸荒之血脉轉橫流爲恬波而聲教於焉無阻且以聳華夏之瞻仰沸波瀾爲化境而反側於焉潛銷此吾標之爲降魔法界良有以也繇此觀之浙之西湖六橋僅亦煙柳之媚景耳何足爲國重輕則朱公之精神力量於斯可槩見矣予與陳憲副藉以張怠掃廢察吏安民而無險阻之患何可無紀若夫兩省之利

賴爲萬世之亨衢則又非紀之所能盡也

朱潮遠曰須彌先生甲戌年代巡黔南與先
君緇衣夙契爲湖廣左藩時又與先君計偕
長安後歷南大司空招遠石城一晤追念先
子復以此記示觀遠有七閩之役遂不能再
奉杖履矣先友梁君子于涖令先生里萬安縣
先生曾便郵爲先友寄書至漳南附詩云送
君南路意如何海上風濤慎爾過世事蜃樓
爭變幻人生龍性肯消磨武彘鐵笛聞仙曲
邊海戈船靖凱歌標柱歸來余未老竹亭清
影許婆娑梁子遂死萬安節今每思友誼古
道如須彌先生飲光梁子
者皆不能再見之人惜哉

梁子于涖江都人癸未成進士授萬安令臨
死絕命詞曰但知生富貴誰識死功名到頭
成箇是方見古人情著有谷菴諸集余與唱
和最真惜其無子詩文遂不傳矣悲夫

盤江鐵橋記

沈翹楚

盤江鐵橋總憲同人朱公所構也其地一江奔
流兩山斷岸水深無底爲黔滇天地之界自張
騫通道以來用小舟艤渡水湍瀉激舟輒壞人
墮溺水搏薄之而去輒爲魚龍得每日必有所
傷計古今傷人不可指數安酋之亂朱公率千
兵逆滇道四面賊兵遮逼數萬騎公夜渡倉卒
幾溺旣濟指水而誓曰孔明有瀾江鐵橋此渡
非鐵鑄不可吾不能爲鐵橋者以吾身殉旣而

以公力汎掃寇孽滇道復通謀所以構橋者費不貲或勸捐助不能十之三公出宦來俸積畢掃以供役經始於崇禎元年至三年終事竣其制之堅緻工之玅巧見之刻勒歌咏有飛虹天棧之句而公以示沈子沈子輾然色動曰壯哉非嘗之原黎民懼焉造化有憾人力補之此孔道也藉此安行不朽矣吾想夫春晴雨霽層峯鎖翠騷人臨眺僕夫車馬粼粼而行空人冉冉而駕鵲至於楛矢東來銅錁橫鶩笳吹草青鏡

歌月白所以解驂而按轡者謂朱公之功至於此是吾又想夫秋高木落水深石出長江一瀉危濤萬狀飛鳥驚而翕翼猿猱愁其攀援誰當褰裳無患擊楫中流不向龍領定歸魚腹所以生死而肉骨者謂朱公之德至於是朱公之利人巨哉朱公聞之謂王大將軍曰吾此舉非爲利人也吾憶昔率千兵夜渡幾不免臣子死於敵應也死於不測之淵泯泯以沒吾至今心悸所以發願解此阨語次泫然如欲淚下大將軍以

告沈子曰朱公仁人也人與我一體耳以我分
人則小卽與人而不失其救我則大堯舜之病
禹稷之已溺已饑孔孟不忍人之心皇皇汲汲
直於天下自見其身而自補其心之缺陷故仁
覆無外朱公切身受病發願弘深如艾自灸作
此功德安知爲人且病定之後如病現前使人
無病我心猶憾是念也豈止利涉一方所以治
亂持危弘濟天下者皆如此橋矣

屯田
泉署

崇禎壬申秋
仲記於貴陽

盤江鐵橋記

陳開泰

嘗觀高宗舟楫之說而知補天浴日之功拯溺
濟川之力非異人豎也宇宙間有一番精神斯
有一番作用以故窮則變變則通迴旣倒之狂
瀾脫淪胥於彼岸杯睨驪海塊視鰲山蜃蛟無
權天地受制人見竒絕今古而直從心運之耳
若乃處鍛則裕履險維艱擊節徒殷望洋長嘆
而亦奚以爲盤江接金碧孔道肇迹於諸葛丞
相琪球絡繹冠蓋蹶躃入我 明爲盛第江派

金林志書 卷一
行武濤直連南海波狂斷峽雪浪雲流石咽怒
濤風翻水立蘭漿桂棹徒增獎息焉在昔創以
墩者深泓而無可措手自水蘭交訏四裔實偏
處此以與我爭總憲朱公通疆倡義問夜兢舟
施濟作梁之心務觀厥成遂殫血鳩工鍊金貫
索霄摩彩駕而撐半壁之宇暨大司馬朱公節
鉞茲土于疆于里睠盤諸費慨發俸金而居高
一號百司響應建樓爲城護建城爲樓護崇牖
屹地干城明漢壘之威高閣逼天燈光滉江烟

之色其鑿石引繩排空駕島渾融無迹竒狀萬
千則鬼工神斧也其車馳馬驟水盡山連徒御
不驚歡呼來逞則寶筏慈航也其乘利扼關披
荆蕩穢咽喉無阻雄據上游則伏波長城也其
層藩叠嶂插羽銘山遐邇率賓畏威恐後則將
軍武庫也先是予赴鶴近程期迅速尚未熟悉
幸備兵上衛執轡容與仰觀俯瞰蓋低徊畱之
不能去云繼直指劉公來按關查一帶予不佞
有侍陪之役駐蹕江濱奉征驄以前路賞心勝

槩進維駱之後塵踰不測之深淵達大行之絕
頂而如砥如矢咸獲休嘉張頹起敝宣德達情
朱公之精神不朽矣惟是 皇華所至翁河喬
嶽山川映發海方翼翼靡幽弗格靡遠弗柔方
諸焚老勒燕又將軼之是橋之經始於先人者
固金湯八面而鞏固於遐方者且銅柱千秋昔
人有言風霜隨地到又曰先生之風山高水長
猗與休哉盛美并矣而容已於颺紀耶用是謬
爲貂續爰壽之貞珉

崇禎甲戌
季春月記

鐵橋碑記

閃繼迪

天啓元年水藺僭號圍省會炊骨食人上衛連
破安順關嶺查城普安平驛新興亦資樂民諸
郡衛所站大叅朱公諱家民得報自宣鎮來撫
院彭伯王公部院涵月張公題公走蜀借援卽
召毛兵於梁楚嵩洛間馳至以解貴陽圍尋陳
言通上衛彭伯王公報可昇公監軍前鋒事時
方整旅啓行又報賊圍廣順州急遂移兵戡定
旋鎮威清進思臘以圖大方其於上衛未暇也

賊據關查而封江口已三年隔滇爲異域寧復
問朝 覲方貢之有令甲乎先是滇將李天常
忠奮援黔賊乘過江而絕其後應三千兵盡陷
至今戰骨之壘壯士消魂徒增往來一吊傷云
則江之我得而爲我利彼得而爲彼利相懸若
是天啓四年部院衡嶽楊公滇撫曾泉閔公按
院太和陸公括蒼傅公毛伯丘公六箴侯公會
疏公提兵通上衛檄兩將領兵陸千爲從然兵
以守平普難其事公曰若遲遲而賊備以乘事

必遜卽率親兵千名匹馬直上是時西賊婦奢
社輝故諸苗聚落觀農公於此有勝筭揚旌繕
怒通道關關致沙慕頂岱四土司股慄倒戈羅
拜我漢官威儀從此復振焉本年六月十九夜
渡江也其競舟而犯怒濤觸瘴而排苗氛存亡
在呼吸間建橋深意已嘿嘿熱中於是陸續先
建連雲城有嘉城等五座疏請 上勅城名爲
生長佇足地徐而議橋事量江之濶三十六丈
深則從來莫測無措手處傳漢將軍馬援岸創

兩石墩竟付之浩嘆已計今惟有造鐵橋一法
鍊鐵爲繩鑄鐵爲軸繩則直排以過江數三十
每根扣三百每扣或十八斤九斤不等力厚而
如矢兩繩之頭末各出十餘丈穿山窟而納繩
於窟中以鐵軸橫相紐焉覆以巨石人無從知
端倪繩之上平鋪以木兩邊欄緣以鐵繩輪蹄
來往若天馬行空東西頭更建以鼓樓時啓閉
爲橋護各建半月城爲樓護樓之下東則像四
搗地神西則像天王鐵牛石狴爲橋鎮者俱備

江岸造五層樓閣像佛菩薩其上而元真觀三
元宮關聖廟五龍廟地藏殿接引佛皆沿江星
置翠嶂碧流璇題紺宇望之如化城然竒矣哉
始也人咸難之議之公指江誓曰橋不成身與
波臣俱噫壯哉丈夫魯日可却滹河可冰橋之
成已於念動處卜之信非常之原衆人惟有始
終訝之耳工肇於崇禎元年正月落成於三年
冬月里中諸君子書予曰有此橋而後黔有江
也有江而後滇有路也有路而後 朝廷有滇

有黔也若是須圖所以不朽之記適仲儼子來
迎取道江上見所爲闢峽開山穿岩透石金樑
鎖角木斗生婁舉缺陷之界結就長虹徘徊登
眺以動遐思昔者平原策楚而趙全子房忠漢
而韓報豪傑舉事識量罔弗該耳大叅奠黔偉
業史冊不勝書安事斯語雖然非自啖蘂惡知
飴之爲甘予固稔習其苦今盛美又身親歷焉
斯卽謂野史可 國乘屬草亦可大叅別號同
人江都人籍居滇南敝歷涪陵南海上谷晉今

銜 恩被三世再晉勲階一等業茂矣因爲之
詳其事維時總督太子太傅兵部尚書兼都察
院都御史鳳臯張公恒嶽朱公巡撫偉軒王公
巡按太僕寺少卿監察御史太和陸公虹如蘇
公迺松張公世鎮黔國少保玉液沐公藩臬麗
陽朱公迺溪王公無兢蕭公二瞻鄭公我思楊
公貞所趙公菊水朱公人林張公都督賓實許
公副總梅軒商公禹謨陳公其督工叅遊閩備
梁東旭莫文淵李芳先焦大受劉理曹正邦李

世芳許盡忠等也至發銀捐俸出貲官商士庶
悉紀碑次崇禎四年春王之吉總理橋工李芳

先勸

朱潮遠日盤江爲滇黔適中之地峰巒萬疊
瀑布千條若夫四時氣候常如春初寒止于
涼暑止于溫且布穀魚蝦價賤凡常筍蕨梨
薪取之不禁一泉一石俱可適興異花異草
隨地皆生山猿樹鳥晴雨咸宜近兼先人所
創傑閣飛樓連幢萃影翠微烟景蔭蔚葳蕤
與武林之西湖滁陽之瑯琊同一快麗遠已
巳庚午壬申三至其間鐵橋冉冉丹碧峩峩
鐘鼓梵音濤聲漁火使人名利之心頓
消是以先人有志終于斯而不能也
閃允脩先生父廣山公子中畏公累世皆以
詩鳴吳興姚佺詩源選閃氏之詩最多云

創建十一城記

閃迪

漢法之不行於黔也非治黔而廢法不用黔固
未可以漢法治也萬山林立銳首異軀怪石猙
獰狼奔虎視箭鏃鎗擗散無統紀又山肥水瘠
剛柔數觜逐隊東馳環繞不定生理窘蹙而衣
食於禦人倘亦其形局使然故初未嘗不銳意
殲洗後迺不勝犯不勝誅何也聚則抨弓露刃
怒爪磨牙散則牧犢飲羊鋤犁胼胝皆吾人也
又或郊關之外毒箐巉崖我不得而至焉囊篋

腰纏委之而去倖以身免歷險衝危踉蹌呼籲
官兵疾馳踪影滅沒甚者緊關扼要伏莽鳴張
往往失利而返是故始于剝商近則目無官長
始于攫貨近則人茹慘辱何忍言也蓋寨苗以
水西爲頭額水西以寨苗爲爪牙反賊熾則截
路之寇滋孔道迷則中國之援絕威清以南楚
然聲斷滇之宦於四方與四方之宦滇者率北
道建昌南假交趾冒瘴癘經歲年而後達文軌
之世顧若異域者六七年矣朱同翁大參奉

命監安普軍蒙茸荆棘重開一線厥功綦偉于
是相地勢酌遠近創議建城者十一座則盤江
西坡板橋海子馬場諸要害地皆寨苗所據盤
而受指顧於水西者諸城建則宿兵其中出可
攻入可守行李往來收保足恃且於地之中界
壘石爲樓名曰望高急則樹幟鳴金連珠營可
合併邀擊賊乃不能施其飄風疾雨之故智而
我無深入覆敗之虞聲應脉合勢如臂指蓋不
血刃而盜賊止息威清鴨池間水西賊無復有

金相元書 卷一
六
獷而飲馬者閱二年而安邦彥授首餘孽惴惴請降矣是故彼一時也生理窮於山川往來窮於盜賊黔幾不可爲矣公講求長策嘔心竭智用能使山澤崇消光耀闡習寬然戴履無致疑造物之憾然則黔又何不可爲之與有甚矣公之治黔而長於任事也藉使蚤得任事如公者何至百餘年群盜狎處又何至逆煽水西禍中全黔而滇受其敝加楚餉請內帑捐 朝廷金錢千百萬者且十餘禩於此也公爲政好從塞

處求通糾結處作解是役也與盤江鐵橋並出人意表肇工在天啓六年丙寅六月迨崇禎四年辛未五月而城成成樓官廨廟貌市廛井井具備費取諸節餉捐廩役取諸營兵董役取諸將領無躊躇搜括之苦無誅求侵剋之弊崇墉相望所在金湯疏聞 天子嘉其勞績更下大司馬覆議 錫之令名盤江曰連雲西坡曰有嘉板橋曰靖氛海子曰恬波馬場曰奏膚以上蒙 賜名城者又於歸集小黃河建龍新城亦

資建資孔城頂站建鼎新城定頭建定邊城尾
灑建維藩城阿機建石基城次第告成共建十
一座蛇噴豕笑之區霾霧昏慘鄉所聚族不敢
前恫疑駭却者一旦雉堞言言旌旗金鼓遠邇
相屬負販絡繹煙火奏集又重以 欽名規制
赫然重已不佞惟君子之仕也旣已圭組專制
一方庶幾利害便宜是故裴行儉之碎葉張仁
愿之受降遂使西域漠南邊患頓絕作法自我
安得謂古今之不相及也公名家民字同人別

號任子滇南籍江都人萬曆丙午賢書維時先
後總督則太子太傅兵部尚書兼右都御史鳳
臯張公恒嶽朱公巡撫崑壁王公巡按則太僕
寺少卿兼監察御史括蒼傅公太和陸公虹如
蘇公迺嵩張公藩臬麗陽朱公貞所趙公迴溪
王公無兢蕭公菊水朱公我思楊公二瞻鄭公
人林張公其經理則總兵賓實許公副總梅軒
商公禹謨陳公叅遊閩備梁東旭莫文淵焦大
受李芳先許盡忠曹正邦李世芳施國顏指揮

王萬紀等皆督工從事應得併書崇禎四年歲次辛未之吉總理橋工李芳先勒

朱潮遠曰黔南自安酋蹂躪蓬蒿數千里居民鼠散先君建城郭十一座為百姓生聚計再于要隘路口苗賊衝突處建瞭望高樓四座以利仕宦商旅出途一樓凉水井禦仰古毛口塔土賊一樓腊茄禦長牛十二寨賊一樓紅花灣禦毛口六陸比怯賊一樓黔宗嶺禦亦佐泗城雷益三省劫盜四圍共十八丈高二丈五尺豎木樓三層遇有劫盜之際樓下可藏牛畜四五百頭樓上可避行旅人千衆也嗚呼遠自復業來籬垣堂奧尚不能點綴入口先君以封疆數千里守險設防謀出萬全愚子若孫能想見其立心盡職乎不能也

鐵橋志叙

李挺西蜀柱史

卓月朱公予嘗聞其名頃於廣陵方得識荆議論丰裁磊落不凡望而知為簪纓世胄詩禮名流竊醉心焉旋而以所著之風動石恍然亭示予見卓月公經文緯武之長才又旋而以鐵橋志示予見卓月公繼志述事之大孝且使予緣是而厯舊地之思今昔之感無能言又不能已于言也滇居南天之末人文繁盛服飾精巧土產奇珍種種甲天下地處遐荒蠻漢相半救寧

須得名世昔諸葛武侯鞭撻百蠻肇造瀾滄橋
以奏七擒之勲越五代數百載有 同人朱公
繼造盤江橋以弘萬世之濟諸名公亟力讚揚
心悅誠服惟恐不足表同人公之偉伐然皆玩
味繼廸閃公之記仲儼太史之詩想像其景敷
衍爲文以褒厥美而實未履此橋目其績也予
昔承乏永平令自楚而黔而滇以身試之兩省
形勢較之海內覺高數千丈計車馬往來若在
天際當其過關嶺望盤江甫離懸岩之險忽不

禁汪洋之嘆輿人曰有朱方伯公所修之鐵橋
在久成安瀾不足慮也少頃至江頭寺觀森然
廟宇巍然碑記標題炳然此予所口誦而心維
者少頃至橋頭則見江面之濶爲費之多功成
之難此又予所目擊而裹駭者迺神運鬼輸其
效靈于同人公而助其力宛若天造地設使人
緩步涉之竟屬坦途恬然而登彼岸若不知其
爲橋此其奇異爲何如者恒情濟人利物之心
每不敵身家之念同人公因監軍而冒若險因

冒險而建若橋爲朝廷計封疆爲行道免洄濤
罄生平養廉之資盡付之一橋略無難色而但
以清白二字貽子孫觀其自誓者曰此橋不成
寧與波臣同逝殫精竭力遂垂千百世不朽之
功仁人之言利誠溥哉計此橋大約彷彿瀾滄
之制瀾滄在永昌界去碧鷄金馬之區計一千
五百里許惟閃公橋梓往來之所必經故深識
其詳此外除巡方侍御及騰衝兵憲則皆聞而
知也予昔待罪永平爲永昌屬邑幸身歷而睹

此名勝焉其江視盤江稍窄而巖險水迅則無
異昔諸葛武侯能建若橋于迤西今同人公亦
能建若橋于迤東後先媲美今古一心同人公
其諸葛武侯之復生乎同人公世業在曲靖昔
予越盤江歷所造之十一城涉普安交水而過
其門輿人曰此卽造盤江橋朱方伯公之宅第
然行色匆匆不暇悉公爲何如今而始知爲卓
月公之尊大人旣懋旬宣之績復運折衝之籌
思深已溺心存弘濟洵百世永賴功不在禹下

開闢來惟女媧氏以五色石補天猶似幻杳同人公以鐵繩補地煥然實績迄今水不揚波慈航普渡四裔消窺伺之釁仕商釋舟楫之驚同人公其參天兩地之人乎目今有卓月公孝賢以承先烈又有雲卿之慈孫以繩祖武可見造物之報同人公與此橋而並悠久書曰作善降之百祥又曰惠迪吉維影嚮亶其然乎至于瀘水之說予昔謁兵道于騰衝曾渡一江係黑水之支流其水湍沸甚迅視江面無幾然必曳舟

上十里許而後撐駕橫行迺去渡口必下數里許而後泊岸梁州水性湍急大率如此兩岸壁立萬仞深菁茂林谿水所出皆山木敗葉每有蛇虺之毒故水色多黑此瀘之所由名也行人中其毒則手足麻木口鼻俱納蒜屏氣不息而後無患一切炊食先煮水百沸而後投米于釜俗云滇黔蠱毒卽此之謂其云土人養蠱殺人殊不足信此予昔年所深嘗因志記有所謂瀘水之說率俚語而並及之與同人公鐵橋奇功

俱著云

朱潮遠曰梅溪先生流寓姑蘇曾寄黃端木萬里尋親記載孝子渡盤江事最詳乃知陵谷雖遷鐵橋屹然城垣如故尚有數僧奉先祠香火聞之不勝泫然及己亥滇黔入化鐵橋先爲僞秦王據險今邸報中黔督議修今經完固因憶當年鐵匠楊永興者造險設奇能解先人之指畫橋成之後酬功題准世襲巡簡永護盤江卽以過往銅錫量稅分文爲其支給命子孫習其技實慮後日之重修仍以所餘之鐵鍊數千扣造庫貯藏今永興之子孫未審存亡想今修補者卽貯庫之物也嗚呼先人之遠慮如此

鐵橋銘

有引巳巳年十月初二日

雷躍龍

今上改元明年春二月 皇子生遣使分道報

諸藩王江右之役 上命余奉璽書遣事竣

得間歸省廼以冬十月渡盤江會黔監軍事

叅藩朱公新構鐵橋成余始渡輒津津江山

之靈惠徼及此旣讀公石勒知所繇橋則益

大壯公慨然有封狼居胥意是時叛酋授首

露布方聞則又大異公橋伏波銅柱也猗與

休哉余不敏顧唯循任是以特書以垂永永

銘曰盤山蒼蒼盤水洋洋峩峩者橋與之久長

鐵橋銘

張鶴鳴

盤之山鬱乎蒼蒼盤之水汨乎湯湯盤之梁絡
乎康康銅柱勳垂拓土分疆鐵橋利涉裕國通
商君侯之德山高水長

鐵橋銘

謝存仁

盤江有龍未雲嘗興江濱有虹不霽時騰龍之
變化堅金鎖骨虬木平鱗虹之凌空跨濤無足
束湍有躬龍兮虹兮